



Infurmaziuns davart la vaccinaziun cunter COVID-19 da l'atun 2022 per persunas spezialmain periclitadas

Il pli important en furma concisa

- Persunas spezialmain periclitadas per grevs decurs da COVID-19 pon l'atun 2022 meglierar lur protecziun cunter in grev decurs da la malsogna almain per in tschert temp.
- A tut las persunas spezialmain periclitadas vegni recumandà fermamain da laschar rinfrestgar la vaccinaziun l'atun 2022. Quai èn:
 - persunas da 65 onns e dapli
 - persunas da 16 onns e dapli cun tschertas malsognas cronicas
 - persunas da 16 onns e dapli cun trisomia 21
 - dunnas en speranza
- La vaccinaziun cunter COVID-19 è segira – er per persunas attempadas, per persunas cun tschertas malsognas cronicas e per dunnas en speranza.
- Per infurmaziuns supplementaras → [fegl d'infurmaziun «Infurmaziuns davart la vaccinaziun cunter COVID-19»](#)

Tge persunas valan sco spezialmain periclitadas?

- a) persunas da 65 onns e dapli
- b) persunas da 16 onns e dapli cun tschertas furmas da las suandantas malsognas cronicas¹:
 - pressiu dal sang auta
 - malsognas dal cor e da la circulaziun
 - diabetes
 - malsognas dal pulmun e da la via respiratorica
 - cancer
 - malsognas e terapias che flaiventan il sistem d'immunitad
 - adipositas (BMI \geq 35 kg/m²)
 - insuffizienz dals gnirunchels
 - cirrosa hepatica
- c) persunas da 16 onns e dapli cun trisomia 21
- d) dunnas en speranza

Tge signifitga «spezialmain periclità»?

Suenter ina infecziun cun il coronavirus avais Vus ina gronda ristga per in grev decurs da la malsogna COVID-19. La protecziun da la vaccinaziun da fin ussa po sa reducir. COVID-19 po avair consequenzas gravantas u schizunt fitg gravantas per Vus. Vus pudais per exempel survegnir grondas difficultads da respirar en cas da malcostas. Sche quai capita, duvrais Vus oxigen e stuais ir a l'ospital. I po durar ditg, fin che Vus essas puspè sauna u saun. Sch'ils sintoms da la malsogna vegnan pli fermes, stuais Vus vegnir tractada u tractà sin la staziun intensiva. Forsa duvrais Vus ina respiraziun artificziala. COVID-19 po ultra da quai donnegiar ils organs e manar en il mender cas a la mort. Suenter ina infecziun cun in grev decurs da la malsogna po ina persuna pertutgada avair problems da sanadad da lunga durada (malsogna post-Covid-19) – sco per exempel difficultads da respirar durant activitads strapatschantas, spussada u problems da sa concentrar.

Pertge ma vegn recumandada la vaccinaziun da rinfrestgament l'atun 2022?

Cun adina dapli contacts en locals interns vegn il coronavirus a partir da l'atun 2022 probablmain a circular puspè pli fitg tranter ils umans. La ristga da s'infectar cun il virus resp. da survegnir la malsogna COVID-19 vegn uschia puspè ad esser pli gronda durant la stagiun d'enviern.

Vus avais ina gronda ristga per in grev decurs da la malsogna e tar Vus sa reducescha la protecziun da las vaccinaziuns precedentas il pli fitg. La vaccinaziun As porscha almain per in tschert temp ina meglra protecziun individuala cunter in grev decurs da la malsogna e cunter las complicaziuns d'in tal decurs. Sche Vus As laschais vaccinar, reducis Vus supplementarmain la ristga d'eventualas consequenzas da lunga durada (malsognas post-COVID-19).

Cura duai vegnir rinfrestgada la vaccinaziun?

La vaccinaziun po vegnir fatga l'atun 2022 il pli baud 4 mais suenter l'ultima vaccinaziun cunter COVID-19 resp. il pli baud 4 mais suenter ina infecziun cun il coronavirus constatada. Quai vala er per persunas spezialmain periclitadas che han gia laschà rinfrestgar la vaccinaziun duas giadas. Ellas pon uschia puspè augmentar lur protecziun persunala cunter in grev decurs da la malsogna.

Ulteriuras vaccinaziuns cun vaccins inactivads (sco p.ex. la vaccinaziun cunter la gripa) pon vegnir fatgas avant, suenter u a medem temp sco ina vaccinaziun cunter COVID-19.

Resguardai per plaschair: Avais Vus auta fevra? Essas Vus malsaua u malsau u As sentis Vus mal? Lura spustai il termin da vaccinaziun.

¹ La glista detagliada da las malsognas chattais Vus sut:
Kategorien besonders gefährdeter Personen

Tge vaccin vegn recumandà?

Per la vaccinaziun recumandain nus da preferenza in vaccin mRNA adattà ad ina varianta (bivalent) u il vaccin a basa da proteïns da Novavax, sche quests vaccins èn disponibels. I n'emporta betg, cun tge vaccins che las vaccinaziuns da fin ussa èn vegnidadas fatgas.

Tar ils vaccins mRNA (Pfizer/BioNTech u Moderna) èn adattads per la vaccinaziun da rinfrestgament da l'atun 2022 tant ils vaccins (monovalents) da fin ussa sco er in vaccin adattà ad ina varianta (bivalent). Las datas actualas mussan, ch'ils vaccins mRNA monovalents protegian er en cas da las novas variantas dad Omicron cunter grevs decurs da la malsogna cun ospitalisaziuns.

Impurtant: Dunnas en speranza e dunnas che tezzan duessan sa laschar vaccinar cun in vaccin mRNA (betg cun il vaccin a basa da proteïns da Novavax).

Tge vala, sche jau n'era fin ussa betg vaccinada u vaccinà cunter COVID-19?

A tut las persunas spezialmain periclitadas che n'èn l'atun 2022 anc betg vaccinadas, vegni recumandà da sa laschar vaccinar cunter COVID-19 cun duas dosas en in interval da 4 emnas.²

Co poss jau ma proteger supplementarmain?

Sche Vus tutgais tar las persunas spezialmain periclitadas, pudais Vus As proteger cun mesiras complementaras cunter ina infecziun cun il coronavirus (p.ex. purtar ina mascrina en locals interns). As orientai en quest connex a noss princips fundamentals

→ [pagina d'internet «Uschia ans protegin nus»](#).

Tge vala per las persunas d'assistenza da persunas spezialmain periclitadas?

La vaccinaziun da rinfrestgament vegn recumandada a tut las persunas d'assistenza ed a tut las persunas spezializadas dal sector da sanadad che vulan reducir in pau lur ristga da s'infectar, quai per pudair cuntinuar cun l'assistenza da persunas spezialmain periclitadas e per pudair garantir il provediment da la sanadad.

A questa gruppa dat l'ulteriura vaccinaziun da rinfrestgament ina protecziun minimala e da curta durada cunter ina infecziun cun in decurs miaivel da la malsogna: La transmissiun dal virus sin autras persunas na po strusch vegnir impedita.

Ulteriuras infurmaziuns

Custs: Ina vaccinaziun cunter COVID-19 recumandada è per Vus gratuita.

Pussaivladads da vaccinar: As infurmai sin la pagina d'internet u tar l'infoline da Voss chantun (www.bag-coronavirus.ch/kantone), nua che Vus pudais As laschar vaccinar.

Ulteriuras infurmaziuns davart la vaccinaziun cunter COVID-19 chattais Vus sin la pagina d'internet da l'Uffizi federal da sanadad publica: www.bag-coronavirus.ch/impfung
Contactai Vossa media u Voss medi en cas da dumondas u As infurmai en Vossa apoteca.

Links:

- [Co funcziuna la vaccinaziun cunter COVID-19? | UFSP \(\[bag-coronavirus.ch\]\(http://bag-coronavirus.ch\)\)](#)
- [Dumondas frequentas \(FAQ\) \(\[admin.ch\]\(http://admin.ch\)\)](#)



² A persunas sut 30 onns vegn l'immunisaziun da basa recumandada – en tschertas situaziuns – da preferenza cun il vaccin da Pfizer/BioNTech.